

Gion Beer Sgier, Sedrun

1942-2006



bb-Suenter cuorta e greva malsogna ei igl anterius president communal da Tujetsch Gion Beer morts ella vegliadetgna da 64 onns. Ina baselgia fullana da ha priu comiau la sonda vargada dad el, seregurdond d'ina persuna ch'ei s'engaschada pil beinstar e prosperar da sia vischernaunca.

Avon in onn ha il Gion giu scret divers artechels en la Tuatschina, denter gl'auter era in cun il telel il

virus e sia miserabla reputaziun. En siu agen lungatg, cun siu senn da perscrutaziun haveva el priu dapart quella materia. El ha giu scret: «*Il virus ha enconuscentamein in schliet num. En verdad vivan els cun nus carstgauns gia da vegl enneu en ina simbiosa cun avantatgs per mintga partenari. Nuscheivels vegnan els pér cura che l'atgna survivenza ei periclitada. En gliez cass ein els buca tec maneivels.*» Ed avon gnanc dus meins ha el sez survegniu la nova ch'el seigi taccaus dad in tal virus; dil cancer. El era gest vid surdar sia fatschenta ch'el ha tgirau dapi prest 40 onns en novs mauns ed ira en pensiun ch'el ei vegnius confruntaus cun quella nauscha malsogna. Tochen alla fin ha el buca cartiu che la malsogna dumignass el. Ferm era el perschuadius ch'el vegni puspei en pei e sappi guder siu temps da pensiun. Denton: Il carstgaun propona e Dieus dispona.

Cun gronda speranza eis el ius a Bellinzona nua ch'el ha spitgau migliur. Las suffrientschas ed il pitir ein carschidas di per di. «*Sundel jeu vivius aschi miserabel che jeu stoi pitir sin tala moda?*» eis el sez sedumandaus. Nus sperein ch'el hagi survegniu risposta sin tontas e tontas damondas cura ch'el ha calau da fladar ed ius sur la sava vi en la perpetnadad. A nus che restein aunc in tschancunet sin quella via terrestra resta la cardientscha en in Diu buntadeivel, e la speranza che tut nies far e demanar cheu sin tiara surveschi per contonscher ina veta perpetna.

Il Gion ei naschius odem il vitg Sedrun en la gronda famiglia da Clau Antoni ed Anna Maria Beer-Pally. Sper el ha el giu treis frars e tschun soras. Quella gronda famiglia ha pretendiu tut dils geniturs. Suenter las scolas obligatoricas viseta el per entgins onns

a Mustér la scola claustral, enzaco ha quei buca plaschiu ad el ed el ei ius aunc pli engiu ed empriu da mecanist d'autos a Trun. Cheu ha el era gest empriu d'enconuscher sia dunna l'Anita Sgier. Igl onn 1965 ein els maridai e la lètg ei vegnida benedida cun treis affons. Igl onn 1968 ein els secasai a Sedrun. Il Gion haveva finalmein anflau sia clamada preferida. Cun sescolar sil sectur da radios e televisiun ha el era giu la curascha da sez arver fatschenta. Ussa ei l'anteriura fravia da siu bab stada gest endretg. Cheu ha el endrizzau sia nova fatschenta. Tochen avon dus meins ei quei stau sia missiun. El e sia dunna han surviu alla clientella cun tutta premura e savida, el ha scolau auters vinavon e dau lavur e fadigia. Co el ei selegraus avon cuort temps d'anflar ina buna sligiazion e saver dar vinavon sia fatschenta e saver che quella hagi ina continuaziun.

Essend turnaus anavos en sia patria eis el semess en cun grond interess pils fatgs communals. El ha surviu alla vischnaunca cun surprender differents uffecis. Sia cunscienziusa lavur e ses buns cussegls han perschuadiu il pievel tujetschin. Attestau han ei quei sil pli tard cura ch'ei han elegiu el sco president communal. Tgi che ha luvrau cun el sa attestar ch'el ha adina adempliu la lavur els differents uffecis cun interess e bien inschign. Sia devisa fuva quella da liquidar las caussas serius e schi spert sco pusseivel e quei entochen la davosa piculezza. El senuspeva era mai da motivar e pretender il medem dils auters. En quei grau eis el ius – el ver senn dil plaid – ordavon cul bien exempl.

Buca ch'ei fuss adina stau sempel da s'accordar cun ses meinis e sias ideas. Ni ella sfera privata ni dalla politica. El carteva e fidava, mo ha era stuiu sentir che buca tut va tenor giavisch. Beinenqualga ha ei giu num laguoter da schetg entginas disillusiuns. Denton vargau savevan ins discutar surlunder, eran ins era buca adina dil medem meini, cura ch'ei era vargau steva ei vargau.

Gion, era sche Tia via ei terminada, nus vegnin a tener Tei en buna regurdientscha. Nus engraziein a Ti da cor per ils muments communabels, per Tia lavur prestada per nossa cumionza, per Tiu engschi per il prosperar da nossa Val e ch'ei ha dau Tei. Sin seveser.

President communal Pancrazi Berther seregorda dil defunct

Nies car, anteriur president communal Gion Beer ei morts, suenter ina cuorta e greva malsogna, denton tut nunspitgadamein, ella vegliadetgna da mo 64 onns. Miu davos discuors cul defunct hai jeu giu paucs dis avon sia mort. Malgrad sia vusch falombra e fleivla, era Gion plein curascha e speranza ch'el damogni la maligna malsogna.

Gion Beer ei staus ina persunalitat capavla, mudesta, simpatica ed emperneivla, cun in grond engaschament per il beinstar general. En giuvens onns ha el fundau in'atgna fatschenta da radio e televisiun e menau quella - ensemes cun sia consorta Anita - cun grond success.

Malgrad quei pesont buordi professiunal ei il car defunct s'engaschaus da tutta forza sin differents secturs per il maun public ed en favur da numerosas uniuns.

Gion ei staus denter auter

- commember dil cussegl da vischnaunca (1979-1980)
- president dall'Ovra electrica Tujetsch (1981-1982 commember, 1983-1987 president)
- 4 onns gerau dil departament d'educaziun (1981-1985)
- Commember dil cussegl d'administraziun della Banca Raiffeisen Tujetsch (1993-2006)

Ils 10 da matg 1987 ha la radunanza communal elegiu Gion Beer sco president communal da Tujetsch. Quei uffeci ha el adempliu entochen il fenadur 1993. Sis onns ei Gion staus in bien e premurau president.

Cuort suenter sia elecziun han las contractivas per il plazzal dalla NEAT a Sedrun entschiet. Quei ei stau ina da sias pli pretensiunas incaricas! Dall'entschatta ennu eis el seprofundaus en quels novs problems ed ha priu las disposiziuns per che quei project gartegi a moda optimala. El ha adina encuretg ina buna collaboraziun cun tuttas instanzas. Buca confrontaziun, mobein «il discours» era sia devisa. Aschia ein ils gronds e grevs problems vegni sligiai en buna entelgientscha, quei che ha possibilitau da recalgar considerabels avantatgs per nossa vischnaunca.

Sper quella ovra centrala e las incaricas ordinarias ein era auters impurtonts projects vegni realisai, sco per exempl:

- projects forestals Bugnei e l'entira costa da vart seniester (Lauber 1 e 2)
- surprida dil bogn cuvretg e pli tard la sanaziun
- engrondaziun dalla casa da scola a Sedrun
- engrondaziun casa s. Vigeli Sedrun
- zona da sport e golf a Selva
- participaziun alla Casa da tgira Sursassiala a Mustér

Sco representant dalla vischnaunca ha Gion appartenui 6 onns al cussegl d'administraziun dallas Sedrun Pendicularas. Era en quei gremi ha el demussau gronda capientscha per innovaziuns. Duront quei temps han ins engrondiu l'ustria a Milez ed eregiu las sutgeras Alpu-Calmute Cuolm-Val. Plinavon ei era il capital d'aczias vegnius alzaus.

Menziun speciala mereta sia appartenenza alla suprastanza dil Spital regiunal Surselva naven digl onn 1993 entochen sia mort.

Al car defunct admettein nus nossa profunda renconuschientscha ed in resentiu Dieus paghi per sia nunstunclenteivla e buna lavur en favur dil beinstar dall'entira vallada e da nossa regiun.

Nus salvein president communal Gion Beer en buna ed engrazieivla memoria.

Car Gion, ruaussa en pasch.